

大清會典
兵部



大清會典卷之

兵部

武選清吏司

出征

凡


親征

皇帝躬統六軍。征討弗庭。先

簡大臣總理軍營。遣官於

鑿輿所經之地。計程設驛。統兵各官。率士旅秣馬礪

兵。以待調發。既卜日。乃陳將士列軍陣而



大清會典 兵部

親訓之

頒行軍律令遣官祇告

天

地

宗廟

社稷及期鑿儀衛陳騎駕鹵簿於

午門外兵部陳八旗蒙古畫角十有六海螺二百

於

堂子街門外設

御營黃龍大纛於內門外設八旗羽林纛火器營纛

各八於黃龍大纛後

皇帝御征衣佩刀乘馬出宮詣

堂子行禮畢致禮於

大纛之神禮成儀詳禮部

皇帝屬橐鞬乘馬內大臣侍衛率親軍舉黃龍大纛

隨行八旗官軍豫於郭外分左右翼陳列首前

鋒軍次烏槍護軍次護軍次烏槍驍騎次驍騎

次滿洲礮兵次漢軍火器營兵

駕出郭三發礮官軍皆馬上俯伏候

駕過各整伍以次隨發不隨征之王公百官於大軍

列隊之前。兩旁跪送。○師行之制。兵四人從。役各一人。爲一幕。每兵給馬四匹。兵役各乘其一。以二馬。負田。胄軍械糗糧。鑊帳之屬。各分隊。以次而行。牧馬於途。分左右路。前隊牧馬於路左。則留路右。以待後隊。均總隸於領侍衛內大臣。每舍。護軍統領。營總。武備院。卿。立。

御營。設帳殿幕幄於正中。繚以幔城。前爲旌門。領侍衛內大臣。率侍衛親軍宿衛。建刁斗。設巡警。其外爲網城。設門三。每門。以上三旗護軍守之。外營連帳大城。設門四。每門。以八旗護軍守之。前

鋒軍列爲二營。屯於

御營之前。八旗護軍驍騎。列爲十六營。八旗漢軍火器營。兵列爲四營。扈從部院堂司官。筆帖式。列爲一營。八旗察哈爾。蒙古。扎薩克。綠旗兵。各列爲一營。每營以王公大臣領之。均繞

御營而屯。○六軍列陣。中設鹿角。漢軍火礮。烏槍。及綠旗兵。左右列。滿洲火器營。烏槍。護軍。烏槍。驍騎。礮營。驍騎。次首隊。列前鋒。護軍。驍騎。及前鋒。護軍。驍騎。殿兵。各按旗爲隊。一字列陣。二隊。列護軍。驍騎。如之。其分列於左右兩翼者。爲援兵。各

大清會典
按旗相屬。而斜列其隊。大軍輜重。各隨本旗。參領。立於陣後百步之外。部院官。暨內務府護軍。執事。各前鋒軍。均扈從。

御駕。以備調遣。蒙古軍。別為一隊。以備追擊。○六軍凱旋。鑿儀衛。陳法駕。鹵簿。在京王公百官。均出郭五里。跪迎。

皇帝入都門。詣

堂子行禮。畢。還宮。翼日。行飲至策勳禮。從征將士。爵賞

有差。擇吉。

御殿受賀。如大朝儀。詳見禮部

凡

命將

皇帝命大將軍統帥軍旅。擇吉出師。先期所司陳

欽賜甲冑弓矢於

午門。頒賞畢。大將軍率從征將士。恭詣

御前。授行師方畧。至日。

皇帝臨軒。授大將軍勅印。大將軍啟行。

乘輿親餞於長安門。

賜卮酒。大將軍跪受。飲畢。佩弓矢。乘馬。文武大臣承

詔。餞於郊。設祖帳。禮兵二部堂官。奉茶。大將軍率從

征將士望

闕謝

恩乃整旅而行首列

上賜軍械次令箭次

勅印護

勅印官內閣學士一人隨行大將軍騎後建大纛叅

贊大臣及戶部官一人兵部官一人刑部官一

人記室官四人內閣中書二人翰林院筆帖式

二人均隨纛行次標旗次大軍整旅隨發既涖

營簡閱營伍大將軍啟行鼓吹聲礮守營大員

官兵離營候送每至一營官兵皆整隊列陣大

將軍巡閱既周統兵提鎮率所屬官隨行離汎

乃止其行軍機要聽大將軍因地乘時運籌決

勝奏凱還

朝

皇帝臨軒大將軍恭繳

勅印行禮畢乃

賜燕及爵賞有差擇吉獻俘受俘告成功於

地天

宗廟

社稷。勒碑太學。以表殊勳。禮部詳若

命重臣經畧軍務。其出師節制亦如之。

凡行軍律令。將帥稟

廟謨。作士氣。度虛實。審機宜。毋偷安。毋喜功。毋信讒。

毋虐士卒。毋私用僉壬。毋輕進以挫先聲。毋僥

倖以失機要。毋避難而阻撓。毋嫉功而傾軋。毋

玩寇。毋養姦。毋老師糜餉。毋培克糗糧。毋暴殘

降卒。其悖違矯誣干

成憲以自取戾者。刑茲毋赦。○將士。穀甲冑。礪兵

刃。備槍礮。峙糗糧。鎧仗書名。馬駝烙印。師行有

期。如約而至。整旅以行。視旗纛為行列。毋越伍

毋離次。毋擁擠喧嘩。毋遊騎馳驟。毋追射禽獸。

軍過。毋騷擾。毋踐踏。毋掠貨財。毋毀民居。毋姦

婦女。駐營時。帳各出一人。以候。見藍旗出。則取

薪。見黑旗出。則取水。毋擅出入。議軍機。毋竊聽

宣洩。傳軍令。毋增減要言。毋私語舛望。毋煽惑

流言。毋疑鬼疑神。毋醉酒行暴。毋行竊逋逃。毋

拾遺私慝。毋溺情怠惰。而違使令。毋不戒於火

以致燎原。遇夜警。則設備制敵。毋倉皇駭亂。夢

大清會典
寐毋警呼。偵諜毋妄報。守哨毋偷安。馬駝牲畜
牧養如法。毋縱蹂躪。毋汙水泉。毋遺忘軍械。毋
狼戾資糧。違者視其所犯輕重。以行軍法。將校
論罰有差。○臨陣接戰。聽金鼓以爲進止。毋却
顧。毋耳語。毋離隊而尾人後。毋棄伍而入別行。
毋違指授而誤事機。毋倡邪說而搖衆志。軍中
毋疾馳涉險。毋嗟怨擊敵。必奮勇前驅。毋畏蕙
退避。毋縱寇遠颺。敵人奔潰。選精騎追之。將領
率大兵殿於後。以禦伏寇。毋貪取輜重而亂行
伍。毋橫殺良民以報戰功。有不用命者戮以徇。

○振旅而歸。以整以暇。毋後先踰越。毋驕矜。毋
縱恣俘獲之人。毋褫其衣服。毋離散其夫婦。毋
掠人之戰功。毋詭無爲有。毋舉輕報重。以冒功
賞。違者軍法從事。



--	--	--	--	--	--	--	--	--	--	--	--	--	--	--	--	--	--	--	--	--

大清會典

